



Broj: 04-40-1-250/26  
Sarajevo, 08.09.2026. godine

Na osnovu dobivenih i obrađenih informacija od: općinskih operativnih centara civilne zaštite, Federalnog hidrometeorološkog zavoda, JU Zavoda za hitnu medicinsku pomoć Kantona Sarajevo, JU Zavod za javno zdravstvo Kantona Sarajevo, MUP-a Kantona Sarajevo, BIHAMK-a i drugih struktura zaštite i spašavanja formiranih na području Kantona Sarajevo, dojava građana, a u skladu sa članom 152. Zakona o zaštiti i spašavanju ljudi i materijalnih dobara od prirodnih i drugih nesreća („Službene novine Federacije BiH“, br. 39/03, 22/06 i 43/10) i čl. 14., 17. i 19. Pravilnika o organiziranju i funkcioniranju operativnih centara civilne zaštite („Službene novine Federacije BiH“, broj 9/19) dostavljamo Vam:

**REDOVNI IZVJEŠTAJ**  
**za period od 08:30 sati 07.09.2026. do 08:30 sati 08.09.2026. godine**

**Kantonalna uprava civilne zaštite Kantona Sarajevo:** Pripadnici Profesionalne vatrogasne jedinice Kantonalne uprave civilne zaštite Kantona Sarajevo u izvještajnom periodu imali su 10 intervencija: pet intervencija na gašenju niskog rastinja, dvije na gašenju kontejnera sa smećem, jedna na gašenju otpada na notvorenom prostoru, jedan izlazak na teren po dojavi o dimu u haustoru zgrade i jedno obezbjeđenje javnog događaja.

**Općinski operativni centar civilne zaštite Stari Grad:** U skladu sa naredbama Štaba civilne zaštite Kantona Sarajevo, Općinski štab civilne zaštite Stari Grad organizovao je 24-satno osmatranje (monitoring) terena na ugroženim područjima od klizišta, lokalitetima Curine njive, Knjeginjac i Bistrički potok (teritorija Općine Stari Grad Sarajevo i Opštine Istočni Stari Grad), te kontinuiranu analizu i procjenu stanja na ugroženom području u cilju osiguranja provođenja pravovremenih mjera zaštite stanovništva (pravovremenog upozoravanja i evakuacije stanovništva, ukoliko to situacija bude zahtijevala) i materijalnih dobara. Uposlenici Službe civilne zaštite Općine Stari Grad Sarajevo, na osnovu zadataka zaštite i spašavanja, dana 07.09.2026.godine, izvršili su obilazak i osmatranje terena na lokalitetima Curine njive, Knjeginjac i Bistrički potok. Cilj obilaska bila je procjena trenutnog stanja terena te identifikacija potencijalnih rizika.

Prilikom obilaska lokaliteta klizišta Curine Njive i vizuelnim pregledom terena ustanovljeno je da su radovi na izvlačenju zemlje trenutno obustavljeni. Na klizištu nisu uočene značajnije promjene. Na gornjem dijelu klizišta, iznad zone u kojoj se izvode radovi, i dalje je prisutno slijeganje tla i proširenje postojeće pukotine. U donjem dijelu klizišta, ispod igrališta, vidljivo je slijeganje zemljišta i odvajanje manjih dijelova zemljane mase kao i proširenje već postojećih pukotina. Nema promjena u odnosu na prethodni dan. Također, i dalje je prisutno nakupljanje zemljanog materijala iznad prvih stambenih objekata, što ukazuje na kontinuirano pomjeranje tla na navedenom dijelu klizišta.

Obilaskom lokaliteta deponije Knjeginjac i vizuelnim pregledom stanja ustanovljeno je da nema značajnijih promjena u odnosu na prethodni dan. U gornjem dijelu deponije i dalje je prisutno blago slijeganje tla. Ova pojava prisutna je kontinuirano od početka izvođenja radova na odvozu zemljanog materijala sa lokaliteta klizišta Curine Njive, te se može dovesti u vezu sa promjenom opterećenja terena uslijed izvođenja navedenih radova. U donjem dijelu deponije i dalje je prisutna formirana plavna i blatnjava površina. Također, na desnoj strani lokaliteta gledano prema gradu, i dalje je vidljivo brazdanje tla, bez uočenih novih promjena, što ukazuje na potrebu nastavka redovnog praćenja stanja.

Na lokalitetu Bistričkog potoka nema značajnijih promjena. Protok vode odvija se nesmetano, s tim da trenutno nije evidentan dotok vode iz pravca Trebevića osim iz kaptaže pored mosta koja se ulijeva u korito potoka. U gornjem dijelu potoka, iznad mosta na području Općine Istočni Stari Grad, i dalje je prisutno obrušeno kamenje i veći broj oborenih stabala.

**Iz ostalih općinskih operativnih centara civilne zaštite s područja Kantona Sarajevo, kao i od drugih davalaca informacija** nisu dobivene relevantne informacije koje se odnose na prirodne nesreće ili druge pojave koje ugrožavaju živote i zdravlje ljude, kao i materijalna i kulturna dobra.

**KJKP Sarajevogas:** Svi potrošači u Kantonu Sarajevo su uredno snabdjeveni prirodnim gasom.

**KJKP Vodovod i kanalizacija:** Vodosnabdijevanje u Kantonu Sarajevo je uredno, osim u dijelovima pojedinih naselja gdje se vrše planske popravke kvarova na vodovodnoj mreži.

**Federalni hidrometeorološki zavod:** Jutros u 08:00 sati temperatura u Sarajevu na mjernoj stanici Bjelave iznosila je 14°C, vlažnost zraka 52%, barometarski pritisak 948,1 hPa.

**BIHAMK:** Saobraćaj se na području Kantonu Sarajevo odvija uredno, osim na dionicama gdje se izvode planirani radovi na kojima se saobraćaj odvija po posebnom režimu.

**Prema informacijama prikupljenih od dežurnih dispečera i informativnih službi KJKP GRAS, Centrotrans – Eurolines d.d. i JP Željeznice Federacije BiH,** gradski, međugradski i željeznički saobraćaj se odvijaju po redu vožnje.

PO OVLAŠTENJU DIREKTORA  
ŠEF CENTRA

**Fahrudin Pribišić**

Dostavljeno:

- Predsjedavajućem Skupštine Kantona Sarajevo
- Premijeru Kantona Sarajevo
- Direktor KUCZ Kantona Sarajevo
- Komandantu Štaba CZ Kantona Sarajevo
- Federalnom operativnom centru civilne zaštite
- a/a